
Фарғонада йилнинг энг яхшилари тақдирланди

Яна бир йил ўз ниҳоясига етмоқда. Кўплаб режалар, мақсадлар, орзу-умидлар билан бошланган 2019 йил ютуқ ва муваффақиятлари билан тарих зарварақларидан жой олди. Фарғона вилоятида ҳам барча соҳаларда улкан ютуқлар қўлга киритилди. Ижтимоий-иқтисодий ривожлантириш дастурлари доирасида жорий йил якуни билан 1,8 триллион сўмлик 372 та лойиҳа ишга туширилиши ҳисобига 6 мингдан ортиқ янги иш ўринлари яратилди. Буларнинг ҳисобига жорий йилда қўшимча 500 миллиард сўмлик саноат маҳсулотлари ишлаб чиқарилди. Инвестиция дастурига мувофиқ 77 та ижтимоий соҳа объектларида қурилиш, реконструкция ва мукамал таъмирлаш ишлари тўлиқ якунланди. Бу каби рақамларни ҳар бир соҳадан кўплаб келтириш мумкин.

Вилоятда яхши бир анъана бор. Йил якунида соҳалар бўйича кўрик –танлов эълон қилиниб, ғолиблар муносиб тақдирланади. Фарғона шаҳридаги Тадбиркорлар марказида бўлиб ўтган кўрик-танловнинг якуний босқичи катта байрам шодиёнасига айланди.

Фарғона вилояти ҳокими Шухрат Ғаниев йил давомида амалга оширилган муҳим ишлар ҳақида тўхталиб, барчани Янги йил байрами билан табриклади.

Ҳаяжонли дамлар яқинлашиб, кўрик-танлов ғолиблари эълон қилинди. “Энг намунали туман” номинациясида –Данғара тумани, “Энг намунали шаҳар” номинациясида –Фарғона шаҳри, “Энг намунали мактабгача таълим ташкилоти”да Бешариқ туманидаги 18-мактабгача таълим маскани ғолибликни қўлга киритди. Шунингдек, “Энг обод кўча”, “Энг намунали олий ўқув юрти”, “Энг фаол журналист” каби кўплаб йўналишларда ҳам ғолиблар аниқланиб, эсдалик совғалари билан тақдирланди. Вилоятда фаолият кўрсатаётган миллий маданий марказларнинг раҳбарлари меҳнати ҳам алоҳида эътироф этилди.

Фарғоналик спортчилар ҳам жорий йилда жаҳон чемпионати, халқаро мусобақаларда кўплаб муваффақиятларни қўлга киритишди. Айни кунларда улар келгуси йилда Токиода бўлиб ўтадиган Олимпия ўйинларига йўлланмани олиш ҳаракатида. Жаҳон чемпионлари ва халқаро мусобақалар ғолиблари ҳам пул мукофотлари билан тақдирланиб, уларга омад ва эзгу тилаклар билдирилди.

Санъаткорларнинг байрам дастури барчага завқу шавқ улашди. Бу каби тадбирлар давом этмоқда.

Фарғона вилояти ҳокимлиги Ахборот хизмати.

2019-12-30 14:59:38